

«Аллоҳ таолодан Месси ва Роналдони Ислом динига ҳидоят қилишини сўрайман»



19:39 / 01.12.2022 2498

Улуғ аллома, шайх Саъид Камалий ҳафизахуллоҳнинг шогирларидан бири ҳадис матнини ўқий бошлади:

«Расулуллоҳ соллаллоҳу алайҳи васаллам марҳамат қиладилар: «Киши Қиёмат куни яхши кўрган инсони билан бирга бўлади...»

Ушбу муборак ҳадиснинг шарҳида улуғ аллома шайх Саъид Камалий ҳафизахуллоҳ қуйидаги мулоҳазаларни айтиб ўтдилар:

«Биродарлар, бу эътибор беришимиз керак бўлган муҳим масалалардан биридир. Ҳар бир инсон кимни яхши кўраётганига назар солсин. Чунки, **«Киши Қиёмат куни яхши кўрган инсони билан бирга бўлади».**

Биттаси Майкл Жексонни яхши кўради, яна биттаси Мадоннани, бошқаси эса Мессини...

Биродар, озгина сабр қил! Кутиб тур! Ўша сен яхши кўраётган инсонинг мусулмон бўлиб олсин, кейин яхши кўрасан. Ҳозир уларни шу ҳолида яхши кўришинг жоиз эмас. Тушунинглар, **«Киши Қиёмат куни яхши кўрган инсони билан бирга бўлади».**

Бу ёқда яхши кўрилиши лозим бўлган қанчадан-қанча улуғ зотлар бор. Пайғамбаримиз соллаллоҳу алайҳи васаллам, Ҳазрати Умар розияллоҳу анҳу ва бошқа саҳобаи киромлар...

Кимнидир яхши кўрмоқчи бўлсангиз, марҳамат, мана шу зотларни яхши кўринг! Киши ўзининг ҳолига қарасин. Бу масалада ҳушёр бўлсин!...

Биз Аллоҳ таолодан Мессини Ислом динига ҳидоят қилишини сўраймиз. Шахсан мен, Аллоҳ таолодан Месси ва Роналдони Ислом динига ҳидоят қилишини сўрайман. Чунки, кўплаб мусулмонлар уларни яхши кўришади. Шунинг учун ҳам биз Аллоҳ таолодан уларни Исломга ҳидоят қилишини сўраймиз.

Юқоридаги ҳадисда Расули Акрам соллаллоҳу алайҳи васаллам муҳим масалани эълон қиляптилар. Киши бир инсонни чин муҳаббат ила яхши кўрса, Қиёмат куни гарчи амали билан ўша инсоннинг ёнидан жой ололмаса ҳам, унга бўлган муҳаббати сабабли Қиёмат куни унинг ёнидан жой олишини баён қилмоқдалар.

Шу ҳадисни эшитган Анас розияллоҳу анҳу шундай деганлар:

«Биз Исломдан кейин бу ҳадисни эшитиб хурсанд бўлганимизчалик бошқа бирор нарсага бу қадар хурсанд бўлмаганмиз. Бас, албатта, мен Расулуллоҳ соллаллоҳу алайҳи васалламни яхши кўраман, Абу Бакр ва Умарни яхши кўраман, амалим уларники каби бўлмаса ҳам, улар билан бирга бўлишни умид қиламан»

Шайх Саъид Камалий ҳафизаҳуллоҳ: «Гарчи амалимиз уларникидек бўлмаса-да, биз ҳам Қиёматда улар билан бирга бўлишни умид қиламиз»

Таржимон: Нозимжон Ҳошимжон

Муҳаррир: Хуршид Маъруф